

ԿԱՐԵՆ ԱՂԱՄՅԱՆ

ԶՈՐԱԿՈՉԱՅԻՆ ՏԱՐԻՔԻ ՊԱՏԱՆԻՆԵՐԻ ԻՐԱՎԱ-
ԳԻՏԱԿՑՈՒԹՅԱՆ ԶԵՎԱԿՈՐՄԱՆ ՊԱՅՄԱՆՆԵՐԸ

Մարդու կյանքի հոգեվերլուծությունը հիմնականում կապված է նրա սոցիալական էության հետ: Նրա զարգացումը պայմանավորվում է ընտանիքի, դպրոցի, միջավայրի ազդեցությամբ: Պատանիների իրավագիտակցությունը ձևավորվում է բարոյական ըմբռնումների զարգացման հիման վրա:

Պատանիների իրավագիտակցությունը հոգեբանորեն նախ ձևավորվում է ընտանիքում: Ընտանիքը լինելով տվյալ պետության փոքր մոդելը՝ իրավագիտակցության հոգեբանական ձևավորման նախահիմքն է: Հիմնականում ընտանիքն է պետության համար քաղաքացի կերտում, անձնավորություն ձևավորում, մարդու մեջ կազմավորում անհատականություն: Ծնողները իրենց բարոյական նկարագրով հոգեբանորեն ազդում են իրենց երեխայի բնավորության ձևավորման և կայունացման վրա: Բարենպաստ ընտանիքում են հոգեբանորեն ձևավորում անձի բնավորության և վարքագծի լավագույն հատկությունները, որոնք դառնում են նրա կյանքի ուղեկիցները: Իսկ այս խնդրում գլխավոր դեր ունի պետությունը, որովհետև որքան համերաշխ ու ամուր է ընտանիքը, այնքան նպաստավոր պայմաններ են ստեղծվում անձի ճիշտ դաստիարակության, իրավագիտակցության ձևավորման համար:

Բարոյական նորմերի ձևավորման ազդակներից է նաև միջավայրը: Ամհատն ապրում, սովորում, ծառայում գինված ուժերում, աշխատում է այլ մարդկանց հետ ունեցած փոխհարաբերություններում: Միջավայրն է, որ լավ կամ վատ հարաբերություններ է հաստատում անհատի և նրա շրջապատի միջև, ազդում նրա հոգեբանության, համոզմունքների և բարոյական նորմերի ձևավորման վրա: Միջավայրում են ստեղծվում հոգեբանական մթնոլորտ, հոգեբանական վիճակներ, տրամադրություններ: Շփման ընթացքում, իհարկե հնարավոր են կոնֆլիկտային իրավիճակներ, պետք է գտնել դրանց լուծման հոգեբանական ուղղիներ:

Իրավագիտակցության շեղումների հասարակական հիմքը հասարակական կոնֆլիկտային հարաբերություններն են: Հասարակության մեջ տնտեսական, քաղաքական, հոգեբանական և բարոյաիրավական կոնֆլիկ-

տային հարաբերությունները ապակայունացնում են հասարակարգը, պատճառ դառնում ոչ ճիշտ դաստիարակության:

Շատ դեպքերում պատանիները կարծում են, թե թերությունների ու սխալների փոխադարձ քողարկումը ընկերասիրությունն է, մինչդեռ դա միայն հանգեցնում է անցանկալի հետևանքների:

Այդպիսի պայմաններում խոսք չի կարող լինել իրավագիտակցության ձևավորման մասին: Իրավագիտակցության կայունացման խնդրում պետք է լավ պատկերացնել շեղումների նախականիման հոգեբանական պայմանները: Իրագիտակցության ձևավորումը կապված է ոչ միայն անհատի հոգեբանությամբ, այլև հասարակական կյանքում տեղի ունեցող գործընթացների հետ: Մարդիկ միշտ չէ, որ հասկանում են հասարակական կյանքի օրինաչափ երևույթները, կարողանում արժեվորել շրջապատի մարդկանց գործունեությունը, վարքագիծը: Գիշտ արժեվորելը բարոյագիտակցության հիմնական պահանջն է, իսկ նյութական ու հոգևոր արժեքներն օգնում են մարդկանց իրավական և բարոյական հայացքների ձևավորմանը: Վերջին տարիներին փորձ է արվում ամրապնդելու հասարակական իրավագիտակցությունը: Դա պետական գործ է, պետությունը պետք է ապահովի անհատի իրավունքների պաշտպանությունը, որովհետև իրավագիտակցության կայունացմանը նպաստում է պետության կայունացմանը, իսկ օրենքների կայունացումը և ըմբռնումը կապահովեն փոխադարձ միասնությունը պետության և հասարակության միջև: Օրենքների կատարումը կապված է այն բանի հետ, թե իրավական է պետությունը, թե՛ ոչ, իսկ իրավական նորմերը պետք է համապատասխանեցնել հասարակության պահանջներին:

Սեր հանրապետությունում գործող օրենքները կյանքում կիրառելու խնդրում կան դժվարություններ, որոնք կապված են երկրի սոցիալ-տնտեսական վիճակի, հասարակական հարաբերությունների հետ: Շատ-շատերը ծանոթ չեն օրենքներին, մտածում են, որ իրավունքը և պարտականությունները մեծերի գործն են: Պատանիներին պետք է բացատրել, ծանոթացնել օրենքների հետ, հարստացնել նրա պատկերացումները, պարզաբանել նրա տեղն ու դերը հասարակական կյանքում: Պետք է ուշադրությունը կենտրոնացնել սոցիալ տնտեսական, քաղաքական կողմնորոշումների վրա:

Մեծ դեր ունի սահմանված իրավունքների մասին օրենքների հիմնավորումը: Դպրոցներում պետք է մեծ ուշադրություն դարձնել ավագ դպրոցականների իրավական դաստիարակությանը: Նրանց հասկանալի պետք է դարձնել, որ իրենք են պետության ապագա կերտողները: Այս ուղղությամբ, պետական ծրագրերի հետ մեկտեղ աշխատանքներ պետք է տանեն հասարակական

կազմակերպությունները, մանկավարժներն ու հոգեբանները, ինչպես նաև իրավապահական ոլորտի ներկայացուցիչները:

«Երեխայի իրավունքների մասին» ՀՀ օրենքի 13-րդ հոդվածը սահմանում է, որ երեխայի խնամքը և դաստիարակությունն իրականացվում են հիմնականում ընտանիքում, դրա համար պատասխանատվություն են կրում ծնողները կամ օրինական ներկայացուցիչները, ինչպես նաև պետության կողմից լիազորված պետական մարմինները: Հենց նրանք պետք է ստեղծեն անհրաժեշտ պայմաններ երեխայի լիարժեք զարգացման, դաստիարակության, կրթության, առողջության պահպանման, ընտանիքում և հասարակության մեջ ինքնուրույն կյանքի նախապատրաստման համար:

Ընտանիքում երեխայի լիարժեք խնամքը և դաստիարակությունն ապահովելու նպատակով պետությունը և նրա համապատասխան մարմիններն օգնություն են ցույց տալիս ծնողներին կամ այլ օրինական ներկայացուցիչներին, երեխայի բարեկեցությունն ապահովելու համար խրախուսում են ընտանիքին աջակցող հոգեբանական, մանկավարժական խորհրդատվական ծառայությունների գործունեությունը:

Իհարկե, բարոյական նորմերի արմատները ծգվում են ազգային հոգեբանության խորքերը, դրանք արտահայտվում են ազգային ինքնագիտակցության մեջ, բայց սոցիալական ցնցումները վնասում են բարոյական նորմերը, ինչը պարզորոշ արտահայտվում է մեր ժամանակներում:

Այսօր դեռահասների գերակշռող մասի հոգեբանությունը բոլորովին չի համապատասխանում կյանքի վերաբերյալ մեր նախկին պատկերացումներին: Անհամատեղելին շատացել է մեր կյանքում, շատ երեխաներ դարձել են թափառաշրջիկներ, մուրացկաններ, դպրոց չեն հաճախում, ավելին՝ ներգրավվում են հանցավոր գործունեության մեջ: Երեխաների հոգեկան մաքրության վերականգման հարցում մեծ է և ծնողների, և պետական մարմինների դերը, որովհետև դեռահասներն ի վիճակի չեն ինքնաքննադատությամբ բացահայտել կամ ընկալել սեփական սխալները:

Օրինակ՝ երեխաների բարոյական ընթրումների մեջ բոլորովին նոր իմաստ է ստացել ընկերություն հասկացությունը:

Սխալ ընկերական հարաբերության խզումը պետք է նախապատրաստել հոգեբանական արդարացված հնարներով: Չպետք է միանգամից նսեմացնել ստեղծված ոչ ճիշտ ընկերական կապերը, հարկավոր է բացատրական հնարքներով նրանց ետ պահել անառողջ միջավայրից, հասկանալի դարձնել դրա հավանական անցանկալի հետևանքները, նրանց գիտակցության մեջ ամրապնդել բարու և գեղեցիկի ընկալումը:

Սակայն ընկերական միջավայրը, որը երեխայի բարոյական ընթրումների ձևավորման գործում հաճախ ավելի մեծ դեր է խաղում, շատ անգամ դուրս է մնում ծնողների հսկողությունից: Ցավոք, քիչ չեն հարբեցող, անհաշտ ծնողները, որոնց անառողջ փոխհարաբերություններն անպայմանորեն բացասաբար են անրադառնում երեխաների հոգեբանությանը:

Սահամանադրության 35-րդ հոդվածի համաձայն, յուրաքանչյուր երեխա ունի կրթություն ստանալու իրավունք:

Պետական համապատասխան կազմակերպությունները պայմաններ են ստեղծում երեխայի անհատականության, տաղանդի դրսևորման, մտավոր և ֆիզիկական ընդունակությունների զարգացման համար: Ստեղծված են հանրակրթական, մասնագիտական, տեխնիկական, մշակութային, մարզական կենտրոններ: Աշխատանքներ են տարվում տաղանդավոր երեխաների հայտնաբերման, նրանց դաստիարակության և կրթության կազմակերպման համապատասխան ծրագրեր ստեղծելու ուղղությամբ:

Այժմ, քաղաքական և սոցիալական բարեփոխումների ժամանակաշրջանում, երբ որոշակի դժվարություններ են ստեղծվել հասարակական կյանքում, կրթական համակարգը գտնվում է անկայուն վիճակում:

ՄԱԿ-ի Կոմվենցիայի 29-րդ հոդվածի դրույթների համաձայն, Հայաստանի Հանրապետությունը դեռահասների կրթությունը պետք է նպատակաուղղի, որպեսզի երեխան գիտակցի և հարգանք տածի մարդու իրավունքների, նրա ազատության հանդեպ, հարգանք մշակի սեփական քաղաքակրթությունից տարբեր քաղաքակրթությունների նկատմամբ:

Նույն հոդվածի համաձայն, յուրաքանչյուր երեխա ունի ծնողին հանձնվելու և նրա հետ համատեղ ապրելու իրավունք, բացառությամբ ՀՀ Սահամանադրությամբ սահմանված այն դեպքերից, երբ դատարանի որոշմամբ ծնողներից կամ ծնողից երեխայի բաժանումը համարվում է անհրաժեշտություն՝ էլենելով երեխայի շահերից:

Ընտանիքի գլխավոր խնդիրը երեխաների անհատականության ձևավորումն է: Սիրել երեխային, չի նշանակում աչք փակել թերությունների նկատմամբ, պարզապես կատարել նրա ցանկությունները: Ինչպես ծնողները, այնպես էլ ընտանիքի ավագ անդամները իրենց բարոյական նկարագրով հոգեբանորեն ազդում են դեռահասի բնավորության ձևավորման և կայունացման վրա, անձնական փոխհարաբերություններով և փոխադարձ շփումներով մշակում են նրանց մեջ զսպվածություն, սկզբունքայնություն, բարյացկամություն, բարեկրթություն և այլն: Շփման ընթացքում, իհարկե, հնարավոր են կոնֆլիկտային իրադարձություններ: Երեխայի դաստիարակության վրա բացասական ազդե-

ցություն են թողնում անհետևողականությունը, երեխայի նկատմամբ ավելորդ խստությունները, պատիժների անարդարացիությունը, երեխայի հետ մտերիմ հարաբերությունների պակասը: Կոնֆլիկտը խորանում է, երբ բախվում են դեռահասի ցանկությունները և ծնողների բարոյական պահանջները: Երեխային սրտակից բարեկամ լինելու համար ծնողից պահանջվում է հոգեբանական մեծ կարողություն: Ծնողը պետք է համատեղի և քնքշանքը, և պահանջկոտությունը: Սխալ է դեռահասի ամեն մի արարքը ներելը կամ անտեսելը: Պետք է դեռահասի հետ ունեցած հարաբերություններում պահպանել որոշակի հեռավորություն, բայց և ջերմությունը, վստահել նրան:

Բարենպաստ ընտանիքում են ձևավորվում երեխայի բնավորության, վարքագծի լավագույն հատկությունները, որոնք դառնում են նրա կյանքի ուղեկիցը: Եվ որքան համերաշխ է ու ամուր ընտանիքը, այնքան նպաստավոր պայմաններ են ստեղծվում դեռահասի ճիշտ դաստիարակության համար:

Կյանքը ցույց է տալիս, որ ծնողների թելադրանքով են դեռահաս շատ երեխաներ զբաղվում մուրացկանությամբ, նույնիսկ գողությամբ, քիչ չեն դեպքերը, երբ ծնողները լքում են երեխաներին, դրա ապացույցը մանկատների երեխաների մեծ քանակն է: Անվիճելի է, որ հանցագործություն կատարող դեռահասներից շատերի հոգեբանության վրա ազդում են ծնողները, նրանք դաստիարակված են լինում անկայուն ընտանիքներում, տեսնում են կռիվներ, դաժանություն: Այդպիսի ծնողները, որոնք չեն կարողանում իրենց պարտականությունները կատարել, ենթարկվում են քրեական պատասխանատվության, պետական հարկադրանքի ավելի խիստ միջոցների: Դեռահասի իրավունքների և շահերի պաշտպանությունը ծնողների հասարակական պարտքն է, նրանց իրավաբանական պարտականությունը: Երեխայի դաստիարակությամբ շահագրգռված է և պետությունը, և հասարակությունը:

Հոգատարությունն է դեռահասի նկատմամբ հոգեբանական վերաբերմունքի հիմքը: Մյուս կարևոր հատկանիշը պահանջկոտությունն է: Պահանջկոտությունը ոչ միայն դեռահասին հիշեցնում է իր պարտականությունները, այլև դառնում է բնավորության հիմնական հատկանիշ:

Պահանջել երեխայից մի բան, չի նշանակում դեմ զնալ նրա սեփական ցանկությանը: Երեխայի բարոյական դաստիարակության կարևոր մեթոդներից է մեղմ, բայց սկզբունքային վերաբերմունքը: Եթե դեռահասը զգում է մտերմություն ծնողի, ուսուցչի նկատմամբ, նրա հոգում առաջանում է անկեղծություն, վստահություն, նա դառնում է ճշմարտախոս, կարող է իր հոգին բացել, ճանաչել տալ իրեն, իսկ դա հնարավորություն է տալիս ճանաչել

դաստիարակել: Իրեն սիրող ծնողի, ուսուցչի պահանջները դեռահասը կատարում է մեծ սիրով:

Մեր օրերում հիմնովին փոխվել են մարդկային ըմբռնումները, շատ շատերը հրաժարվել են կյանքը կարգավորող լավագույն ավանդույթներից, ծնվել են անհամատեղելի նոր սովորություններ: Ստեղծված սոցիալական անհավասարությունը այժմ էլ ոչնչացնում է գեղեցիկ շատ զգացումներ, մարդկանց հոգում ծնում ատելություն: Կյանքի նկատմամբ թերըմբռնումներն ավելի զգալի տեղ են գրավում անչափահասների շրջանում: Իսկ դա հաճախ դառնում է ճակատագրական, որովհետև նրանց մեծ մասը հոգեբանորեն անկարող է զգալ սեփական սխալները, ի վիճակի չէ ինքնաքննադատար բացահայտել իր բնավորության և վարքի արատավոր կողմները:

Այժմ շատ երեխաներ հայտնվել են կյանքի մակընթացությունների մեջ: Ամեն երեխա չէ, որ հնարավորություն է ունենում ապրել բարեկեցիկ ընտանիքում, ստանալ ճիշտ դաստիարակություն, որը մարդու երջանկության գլխավոր պայմանն է:

Հանրապետությունում հաշվառման մեջ են շուրջ 500 մուրացիկ ու անօթևան երեխաներ: «Իրավաբանական թերթի» (1998թ. դեկտեմբեր, թիվ 4) տվյալներով անչափահասների զաղության այսօր մոտ 80 դատապարտյալ կա, իսկ 30-ից ավելին դեռ այն ժամանակվա տվյալներով գտնվում էին նախնական կալանքի տակ: Նրանց գերակշռող մասը ծնողազուրկ կամ սոցիալապես անապահով ընտանիքներից են: Երեխաներին ճիշտ կողմնորոշելը մեծերի գործն է:

Դատապարտյալների հետ պետք է անհատական աշխատանք տանել, համակողմանի ուսումնասիրություն կատարել, պարզել դատապարտյալի հոգեկան վիճակն ինչպես հանցագործություն կատարելու պահին, այնպես էլ դրանից հետո, երբ արդեն ինքը՝ դատապարտյալը, փորձում է արդարանալ կամ ընդունում է կատարած հանցանքը: Միայն հոգեբանական ճիշտ վերաբերմունքը և ոչ թե քրեական պատասխանատվության վախը կարող է վերափոխել նրան:

Գործնական կարևորություն ունի հոգեբանական համուզումը, իսկ անհատի հոգեբանությունը նրա սկզբունքների և գործողությունների կոնկրետ արդյունք է, ՀՀ ուղղիչ աշխատանքային օրենսդրության մեջ դատապարտյալի վերադաստիարակման հիմնական միջոցը պատիժը կրելու ռեժիմն է, ընդհանուր կրթությունը արոճտեխնիկական ուսուցումը, հասարակական օգտակար աշխատանքը: Իհարկե, սրանք օգնում են դատապարտյալի համոզմունքների, բարոյական սկզբունքների վերադաստիարակմանը, բայց անհրաժեշտություն է, որ անչափահասների հետ աշխատի հոգեբանը:

Կերջին տարիներին մեր հանրապետությունում որոշակի աշխատանքներ են տանում անչափահասների հետ աշխատող թաղապետարաններին կից բաժինները, դպրոցները, համայնքները, անչափահասների գործերով տեսուչները, սակայն, ցավոք, դեռևս արծանագրվում են զգալի չափերի հասնող, ընդհուպ ծանր հանցագործություններ:

Ամեն մի ազգային անվտանգության նախարարության կոլեգիայի միստի օրակարգում քննարկվել է անչափահասների կողմից կատարած հանցագործությունների և իրավախախտումների դեմ պայքարի կազմակերպման վիճակը: Եշմարտացիորեն որոշման մեջ շեշտը դրվում է ավելի շուտ հանցագործությունների կանխման վրա: Անչափահասների կողմից կատարված հանցագործությունների դրդապատճառներից զխավորը համարվում է մեծերի կողմից անչափահասներին հանցագործության մղելը: Դա հին երևույթ է. բայց նորոգված ձևով է դրսևորվում մեր օրերում: Պետք է ուժեղացնել իրավական ներգործության մեթոդները, բացահայտել անհատների և խմբերի նմանօրինակ հակահասարակական գործողությունները, անուշադրության չպետք է մատնել անչափահասների կյանքի հետ կապված անհամեմատելի նոր ելույթները:

Փաստերը, որոնք ներկայացնում ենք, հիմնվել են սեփական դիտարկումների վրա: Կենտրոնական փակ շուկայի կանգառից շրջան մեկնող ավտոբուսում հայտնվեց 9-10 տարեկան մուրացիկ մի տղա: Ոմանք նրան դրան մեկնեցին, ոմանք առարկում էին. «Այդ երեխան գլխին տեր ունի», «նրան սպասում է հաջորդ կանգառում, որպեսզի վերցնի հավաքածը և տղային հասցնի հաջորդ ավտոբուսին»: Հաջորդ կանգառում տղային մոտեցավ 20-25 տարեկան մի երիտասարդ, և մուրացիկը նրան մեկնեց հավաքածը: «Տեսեք, տեսեք, աղմկում էին շատերը, - չի համբերում անգամ ավտոբուսը շարժվի»: Մեկ ուրիշ օրինակ. ավտոբուսում սկսեց երգել ու դրան հավաքել անչափահաս մի տղա: Նախորդի համեմատությամբ, սա մաքուր արտաքին ուներ: Երբ մոտենում էինք հաջորդ կանգառին, պատանին լռեց, վերջացած համարեց իր աշխատանքը և առաջացավ: Երբ ավտոբուսը շարժվում էր, նրան մոտեցավ մի երիտասարդ: Սրանք երևույթներ են, որ ծնվել են մեր օրերում: Նման մուրացիկ անչափահասներ հայտնվում են այլ ավտոբուսներում էլ: Ինչպես երևում է կազմակերպիչներին դա բերում է որոշակի եկամուտ: Պետք է հետևողական լինել և կանխել հակահասարակական նման երևույթները և օրենքի ուժով պատժել կազմակերպիչներին: Իրավական ներգործության մեթոդներն անհրաժեշտ են, սակայն չպետք է սահմանափակվել զուտ օրենքի սահմաններում: Այս խնդրում զխավոր գործոններից մեկը նաև բարոյական ներգործությունն է: Այս առումով մեծ անելիք ունի նաև հասարակությունը, մեզնից յուրաքանչյուրը: